

ՄԿՐՏԻՉ ՄԿՐՅԱՆ

Հայագիտության մի շարք բնագավառներում զգալի ավանդ ունի ՀՍՍՀ ԳԱ բոլրակից անդամ, պրոֆ. Մկրտիչ Մկրյանը։ Աշակերտելով անվանի հայագետներ Մ. Արեղյանին, Ա. Տերտերյանին և ուրիշներին, նա իր բազմաթիվ աշխատություններով հարստացրել է հայագիտության պատմությունը։

Անուրանալի է նրա մեծ երախտիքը մասնավորապես հայ բազմադարյան գրականության պատմության ուսումնասիրության ասպարեզում։ Գիտական բազմամյա գործունեության ընթացքում նրա ուշադրությանն են արժանացել գրականության անցած նանապարհի օրինաչափությունները, պատմությունն իրենց ուսերին տանող վիթխարի անհատականությունները՝ Խորենացուց մինչև Նարեկացի, Աբովյանից մինչև Թումանյան, Խառակյանից մինչև Չարենց։

Հին գրականության պատմությանը նվիրված հետազոտություններում Մկրտիչ Մկրյանը վերանայեց որոշ հայացքներ, առաջադրեց հին գրականության պատմության գիտական նոր պարբերացում, նորովի մեկնաբանեց նրա մի շարք խոշորագույն ներկայացուցիչներին։

Ավելի քան շորս տասնամյակների ընթացքում Մկրյանը հրատարակել է մի շարք մեծագործություններ ու ժողովածուներ («Մովսես Խորենացի. կյանքն ու ստեղծագործությունը», «Գրիգոր Նարեկացի», «XIII—XVIII դարերի հայ աշխարհիկ գրականություն», «Հայ հին գրականության պատմություն (V—X դարեր)»), տպագրել բազմաթիվ հոդվածներ, որոնցում գիտական համոզականությամբ մշակել է հին գրականության պարբերացումը, նորովի իմաստավորել պատմաշրջանների բնույթն ու բովանդակությունը, խոշորագույն ներկայացուցիչների ժառանգությունը։ Մկրյանը առաջադրում է հետևյալ շրջաբաժանումը՝ «Հայ գրականությունը V դարում», այնուհետև՝ «IV—IX դարերում», «X դարում», «XI—XII դարերում», «XIII—XVI դարերում», «XVII—XVIII դարերում»։ Այնպիսի մի բարդ խնդիր, ինչպիսին գրականության պատմության պարբերացումն է, կարող է վեճեր հարուցել և քերես Մկրտիչ Մկրյանն էլ ունենա ընդդիմախոսներ կամ լրացնողներ։ Մի բան, սակայն, անտարակույս է՝ գիտնականը ելնում է գրականագիտության ու գրականության պատմագրության արդի փորձից ու մակարդակից և բավարարում է ժամանակակից գիտության պահանջները։ Գիտական համոզականությամբ ու տրամաբանության ուժով նա բացահայտում է յուրաքանչյուր պատմաշրջանի սոցիալ-ֆաղափական ու գեղարվեստական բովանդակությունը, հայտնաբերում ներքին աղբյուրներն ու պատմական հաջորդականությունը, տարբերություններն ու ինքնատիպ գծերը։

Հատուկ ուշադրության է արժանի մասնավորապես V դարի առանձնացումը իբրև ինքնուրույն շրջանի։ «...Հինգերորդ դարի գրականությունը իբրև առանձին մաս բաժանված է վեցից իններորդ դարերի գրականության շրջանից։ Բանն այն է,— գրում է Մկրյանը,— որ մեր կարծիքով հինգերորդ դարի

հայ գրականությունը հիմնականում աշխարհիկ-ֆաղափական (և ոչ եկեղեցական-ֆաղափական) պայքարի գրականություն էր, որը ներկայացրել են մեր դասական պատմիչները՝ Փավստոսը, Խորենացին, Եղիշեն ու Փարսեցին, որոնք էլ իրենց գործերի գիտական ու գրական արժանիքներով մնացին անկրկնելի ամբողջ միջնադարի ընթացքում» («Հայ հին գրականության պատմություն» (V—X դարեր), էջ 7): Բնութագրելով պատմագեղարվեստա-



կան գրականության ծագման նախադրյալները, ինքնատիպ ու տարբերիչ գծերը, դարաշրջանի հասարակական-ֆաղափական կյանքը, այնուհետև համապատասխան բաժիններ է նվիրում Մեսրոպ Մաշտոցին, Ագաթանգեղոսին, Փավստոս Բուզանդին, Մովսես Խորենացուն, Եղիշեին, Ղազար Փարսեցուն: Տեղն է հիշելու Մովսես Խորենացուն նվիրված մենագրությունը, ուր ըստ արժանվույն և Խորենացուն արժանի մակարդակով բացահայտված է պատմա-

հայրը իբրև գիտնական ու մտածող, գեղագետ ու ֆաղափացի, իբրև իր ժամանակի «հասարակական մտքի ու գիտակցության և էսթետիկական նաշակի ամենախոր կրողի»: Խորապես համոզիչ են ֆերքողահոր հումանիզմի բնույթին, հայրենասիրությանը, ֆաղափական հայացքներին ու գիտական մտածողությանը նվիրված էջերը: Առանձին արժեք են ներկայացնում Խորենացու օգտագործած գեղարվեստական հնարանների նուրբ ու նաշակավոր մեկնաբանությունները:

Իբրև առանձին շրջան, Մկրյանն առանձնացնում է նաև X դարը՝ վերջինիս հետ կապելով «հայկական Վերածնության» սկզբնավորումը: Վերլուծելով X դարի սոցիալ-ֆաղափական հարաբերությունները, առևտրի ու ֆաղափների բուռն զարգացումը, մարդկանց բարեբերում ու գիտակցության մեջ կատարված արմատական վերափոխումները, Մկրյանը դարաշրջանի գլխավոր առանձնահատկությունները համարում է հակաֆեոդալական շարժումները: Հետևելով Էնգելսի հայտնի մտքին այն մասին, որ միջնադարում ֆեոդալիզմի դեմ ուղղված շարժումները կրոնական գունավորում են կրել, գիտնականը բացահայտում է մասնավորապես թոնդրակյան շարժման սոցիալական բովանդակությունը:

Դեղարվեստական գրականության մեջ նոր փուլի բնորոշ առանձնահատկությունը համարելով ֆնարեգության սկզբնավորումը, գիտնականը հանգամանալից ֆննդության է ենթարկում Նարեկացու տաղերն ու հանրահայտ «Մատյան ողբերգության» պոեմը: Ժամանակաշրջանի և հայկական վաղ Վերածնության յուրահատկությունների համապատկերում Մկրյանը «մեծ կրոնավորի» ժառանգության մեջ տեսնում է իրական գեղեցկությունների փառաբանումը, մարդկային անափ ողբերգության դրսևորումը իբրև վերածնության արտահայտություն, կատարյալ մարդու տենչը: Մկրյան-հետազոտողի արժանիքներից մեկն էլ այն է, որ ազգային արժանապատվության խոր ու զգաստ զգացումով վեր է հանում հայրենի գրականության մեծ ու ինքնատիպ արժեքները, բացահայտում նրանց ազգային ու համամարդկային նշանակու-

քյունը, համոզիչ զուգահեռներ անցկացնելով եվրոպական ու համաշխարհա-
յին գրականության մեծերի, գրական օրինաչափությունների հետ:

Մկրտիչ Մկրյանը լուրջ ներդրում է կատարել նոր շրջանի գրականու-
թյան պատմության ուսումնասիրության բնագավառում: Այստեղ ևս նրա
հետազոտությունները կենտրոնացել են այն գրողների ու գրական այնպիսի
երևույթների վրա, որոնք զարգացման գլխավոր միտումների կրողներն են:
Ում մասին էլ գրելիս լինի Մկրյանը, համոզիչ բացահայտում է ստեղծագոր-
ծողի մտածողության ու գրելանքի յուրահատկությունները, որոշում նրա տե-
ղը գեղարվեստական զարգացման շղթայում: Երևույթների նորովի մեկնա-
բանման ձգտումն ու կարողությունը լավագույնս դրսևորվել է Խ. Աբսվյանին
ու Պ. Պողոյանին, Բաֆֆուն ու Հովհ. Թումանյանին և մյուս խոշոր անհատա-
կանություններին նվիրված հետազոտություններում ու հոդվածներում: Մկր-
յանի սիրած եղանակներից մեկը բնության առարկա հեղինակին ոչ
միայն հայ, այլև համաշխարհային գրականության համապատկերում բնե-
լու միտումն է, որը հնարավորություն է տալիս հայ գրողի նմանությունը այլ
ժողովուրդների հանրահայտ մեծություններին ու նրանց հետ ունեցած ընդ-
հանրությունը զուգակցել համեմատվողի տաղանդի եզակիորեն ինքնատիպ
յուրահատկությունների հայսևաբերմանը: Վերլուծության այս եղանակը
դրսևորում է ստացել առաջին հերթին Հովհ. Թումանյանին նվիրված հոդ-
վածներում և «Խառակյանի հումանիզմը» հետազոտության մեջ: Գրականա-
գիտական փայլով են գրված մասնավորապես վերջինիս «Սիրո պեզիան» և
«Կյանքի ծառավը» բաժինները, որոնք ինչ-որ տեղ դառնում են մեծ թեմայի
մեկնաբանման՝ իրար լրացնող երկու մասեր: Խառակյանի սիրո երգերին
հավերժ մնալուն արժեք հաղորդող առանձնահատկություններից մեկը, ըստ
գրականագետի, այն է, որ սիրո անցողիկության և սիրո ողբերգական տա-
րերի զգացողությունը ոչ միայն հուսահատության չի մղում ընթերցողին,
այլև հակառակը, ընկալվում է իբրև կյանքի մեծ գեղեցկության, սիրո հա-
վերժության փառաբանություն: Մյուս կարևոր առանձնահատկությունը, որ
կրկին Մկրյանի հետազոտական աշխատանքի բնորոշ կողմերից է, մեծ ան-
հատականությունների թվացող ու իրական հակասությունների մեջ անգամ
մեծ անհատականության ներքին միասնության բացահայտումն է: Ահա թե
ինչու Խառակյանը կյանքի օրհներգու է ոչ միայն սիրո երգերում, «Ալազյազի
մանիններում» ու «Սաադիի վերջին գարունը» արձակ բանաստեղծության մեջ,
այլև «Աբու Լալա-Մահարի» հանրահայտ պոեմում: Եվ դա ոչ միայն այն
պատճառով, որ աշխարհի, իբրև անսկիզբ, անվերջ հրաշքի ընկալումը այս
պոեմի ընդհանրացումներից է, այլև հենց պոեմի ժխտական տարերքի շար-
ժառիթների իմաստով: Մեծ ատելությունը ծնվում է մեծ սիրուց, ժխտման
կիրքը՝ կատարյալի ու ներդաշնակի ձգտումից:

Անվանի գիտնականը բազմիցս անդրադարձել է ժողովրդական բանա-
հյուսության խնդիրներին: «Սասունցի Դավիթ (հայ ժողովրդական մեծ էպո-
սը)» հետազոտությունը, ուր վեր են հանված «էպոսի գեղարվեստական մե-
ծությունը պայմանավորած» առանձնահատկությունները՝ խոր ժողովրդայ-
նությունը, կերպարների հարստությունն ու կատարելությունը, ինտերնացիո-
նալիստական պարոսն ու համամարդկային մյուս բարձր գաղափարները,
«քովանդակության արտակարգ հարստությունը», կառուցվածքն ու լեզվի
պատկերավորությունը, էպոսագիտության լուրջ նվաճումներից է: Կրկին իրեն

հատուկ եղանակներով Մկրյանը հաստատում է, որ «Սասունցի Դավիթ» ժողովրդական էպոսը պատկանում է մարդկության ստեղծած ամենահանճարեղ գեղարվեստական գործերի թվին» («Հայ հին գրականության պատմություն», էջ 335): «Սովսես Խորենացի» մենագրության ծավալուն գլուխներից մեկը նվիրված է պատմահոր «Հայոց պատմության» և ժողովրդական բանահյուսության առնչություններին, որտեղ ֆննդության են առնվում ժողովրդական ստեղծագործության մասին Խորենացու հայացքները, բանահյուսությունից օգտվելու շափի ու կերպի հարցերը, «Հայոց պատմության» էջերում պահպանված հասկացումների գեղարվեստական առանձնահատկությունները: Հին գրականության գեղարվեստական յուրահատկություններից մեկը իրավացիորեն համարելով ժողովրդական անգիր ստեղծագործությունների հետ անխզելի կապը, Մկրյան-հետազոտողը տեսական հետաքննություն է ցուցաբերել այդ կապի հայտնաբերման ու իմաստավորման հանդեպ: Այս հետաքննությունը դրսևորվել է ոչ միայն պատմիչ-գրողներին, այլև Նարեկացուն, միջնադարյան տաղերգուներին և նոր գրականության խոշորագույն ներկայացուցիչներին նվիրված ուսումնասիրություններում: Բացի այն, որ իր գրականագիտական աշխատություններում գիտնականն անդրադարձել է հայ ժողովրդի պատմության կենդանի հարցերին, նա հատուկ մի հետազոտություն է նվիրել հայ ժողովրդի կազմավորման խնդրին («Հայ ժողովրդի կազմավորումը Հայկական լեռնաշխարհում»), որի մեջ, հայտնի փաստերի նորովի մեկնաբանմամբ և հենվելով լեզվաբանական նորագույն ուսումնասիրություններին, պաշտպանում է այն թեզը, որ հայ ժողովրդի և հայոց լեզվի կազմավորման մեջ բիայնացիները նույնպես վնասական մասնակցություն են ունեցել:

Մ. Աբեղյանի և Ա. Տերտերյանի ավանդներով դաստիարակված, նրանց ավանդները ստեղծագործաբար զարգացնող գիտնականը իր ուսուցիչների նման նաև վաստակավոր մանկավարժ է, երիտասարդության, գիտնականների մի շարք սերունդների դաստիարակ: 1933 թ. անընդմեջ դասախոսելով Երևանի պետական համալսարանում (երկար տարիներ նաև այլ բուհերում), նա տասնյակ սերունդներ է նամակել դեպի կյանք՝ հաղորդելով նրանց հարուստ գիտելիքներ, սերմանելով նրանց մեջ սեր ու ճաշակ դեպի գրականությունն ու գեղեցիկը: Մեծ է Մկրյան-դասախոսի հմայքը: Նրա դասախոսություններին բոլորն են սպասում անհամբերությամբ: Ոչ մի վերամբարձ արտահայտություն. հասարակ, սովորական բառեր են, որոնք հենց սկզբից համակում են ունկնդրին, հասնում մտքին ու սրտին: Պրոֆեսորը բացում է գրական գեղեցկությունների անանց արժեքը, գեղարվեստական զարգացման օրինաչափությունները:

Նշանակալի են պրոֆ. Մկրյանի՝ դպրոցին մատուցած ծառայությունները: Արդեն ֆանի տարի անընդմեջ հրատարակվում է հայ գրականության պատմության նրա դասագիրքը, լավագույններից մեկը հանրապետությունում: Գրական մանկավարժական գործունեությունը Մկրյանն սկսել է դպրոցի համար ֆրեստոմատիաներ կազմելով, ըստ որում՝ առաջին ֆրեստոմատիան կազմել է 1930-ական թթ. սկզբներին, պետհրատի գեղարվեստական բաժնի վարիչ Ե. Չարենցի հանձնարարությամբ: Արդեն Չարենցի վստահությունը տակավին երիտասարդ և համբավ շունեցող մարդու հանդեպ ինքնին շատ խոսուն փաստ է: Հիշենք, որ գիտնականը գրականության պատմության դասագիրք է գրել սփյուռֆահայ դպրոցների համար ևս: Ահա թե ինչու արժա-

նիորեն նրա կուրծքը զարդարում է ժողովրդական կրթության ասպարեզում վստակավորի համար սահմանված Խ. Աբովյանի մեդալը:

Անուրանալի է պրոֆ. Մկրյանի երախտիքը գիտական կադրերի ահեցման ասպարեզում ևս: Նրա բազմաթիվ ասպիրանտները մանկավարժական ու գիտական աշխատանք են կատարում ինչպես համալսարանում, այնպես էլ հանրապետության այլ բուհերում ու գիտահետազոտական հիմնարկներում:

Կյանքի և աշխատանքի մեծ հանապարհ է անցել Մ. Մկրյանը: Ծնվել է Վանում 1908 թ., բազմակողմանիորեն զարգացած ու առաջադեմ ուսուցիչ Մամբրե Մկրյանի ընտանիքում: Ապագա գիտնականի առաջին ուսուցիչներից մեկը եղել է հայտնի երգիծաբան Լեո Կամսարը: Սակայն Մկրյանների ընտանիքը ևս կիսում է 1915-ին արևմտահայերին վիճակված ծանր փորձությունները: Վան, Ալեքսանդրապոլ, Թիֆլիս, Երևան՝ ահա պանդուխտ ընտանիքի երթուղին: Երևանում էլ Մկրյանը ավարտում է դպրոցը, ընդունվում համալսարան, որն ավարտելուց անմիջապես հետո նրան պահում են ասպիրանտուրայում: 1933 թ. մինչև օրս նա դասավանդում է համալսարանում, կյանք է համփում սերունդներ, ստեղծում գիտական արժեքավոր գործեր: Արտաֆին խստության տակ թափցնում է մեծ ու անափ մի սեր դեպի ուսանողությունը, դեպի երիտասարդությունը:

Անուրանալի է պրոֆ. Մ. Մկրյանի հասարակական-վարչական գործունեությունը: Շուրջ ֆանհինգ տարի նա գլխավորում է հայ նոր գրականության ամբիոնը, տարբեր տարիների, երկարատև ժամկետներով, եղել է բանասիրական ֆակուլտետի դեկան, ղեկավարել է ԳԱ գրականության ինստիտուտը:

Հայագիտության երախտավորը նույն ավյունով շարունակում է գիտամանկավարժական գործունեությունը: Այսօր էլ նրա դասախոսություններին սպասում են անհամբերությամբ, այսօր էլ նա լսարանը շիկացնում է այս կամ այն գրողի ստեղծագործության գեղեցկությունների անպանույն բացահայտումներով, համաշխարհային գրականության նմուշների հետ բացառիկ նաշակով արվող համեմատություններով, գեղարվեստական զարգացման օրինաչափությունների հստակ մեկնություններով:

Գ. ԱՆԱՆՅԱՆ